

# Årsmelding for HIFO Nordvestlandet 2015

HIFO Nordvestlandet har vore arrangør av to seminar i 2015.

## *Digitale forteljingar om fortida*

Historieformidling og historieundervisning med digitale reiskapar stod i fokus på dette vårseminaret som var eit samarbeid mellom HIFO Nordvestlandet og Historisk institutt ved Høgskulen i Volda.

Tre føredragshaldarar var henta inn for å kaste lys over temaet for seminaret. Kari Hasle, høgskulelektor ved Høgskulen i Volda, gav ei innføring i korleis digitale forteljingar kan nyttast i historieundervisninga. Ved å lage korte personlege forteljingar på 3-5 minutt, fortalt gjennom opptak av eiga stemme kombinert med bilde og film, kan studentane få ei fin innøving i historiefaglege problem og metodar. Hasle viste døme både på eigenproduksjon og studentarbeid.

Det neste innlegget var ved Jan Aakvik, redaktør for Kulturnett Møre og Romsdal og tilsett ved Interkommunalt arkiv i Ålesund. Aakvik har også det regionale ansvaret for nettstaden Digitalt fortalt, ein nettstad der både kulturinstitusjonar og enkeltpersonar kan dele sine digitale forteljingar. Aakvik gav forsamlinga smakebitar frå denne nettstaden, og han viste dessutan korleis Digitalt fortalt er i ferd med å bli kopla saman med andre store samlingar av kulturhistorisk materiale på internett.

Til sist introduserte Arnfinn Kjelland, førsteamanuensis ved Høgskulen i Volda, vevstaden lokalhistoriewiki.no. Karakteristisk for wiki-ar er at mange personar kan redigere og endre artiklar, samstundes som det er mogleg å etterspore all redigeringshistorikk. Kjelland viste korleis wiki-en er bygd opp, med kategoriar som gjer det lett å søkje opp informasjon. Han viste også fleire døme på bidrag frå vår region, mellom anna Sykkylven leksikon.

Arrangementet 11. april samla 25 deltagarar midt på ein blank laurdag i Sunnmørspostens lokale sentralt i Ålesund, mange av dei lærarar i ulike skoleslag.

## *Mat for både fattig og rik. Ein kulinarisk reise gjennom eksportfiskens kulturhistorie*

Tre historikarar tok føre seg ulike aspekt ved tilverking og eksport av norsk klippfisk, i tillegg til bruk av norsk fisk i kosthaldet under fjerne himmelstrøk.

Arnljot Løseth gav ei innføring i kva rolle og status fisk og sild hadde i kosthaldet i dei norske eksportområda i Europa, Karibia og Sør-Amerika på 1800-talet. Atle Døssland fortalte om det første store gjennombrotet for klippfisknæringa på 1700-talet då skotskfødde kjøpmenn kring 1740 skaffa seg norsk borgarskap for å dra i gang klippfisktilverking i stor stil med hovudsete i Kristiansund. Trudi Henrydotter Eikrem gav ein presentasjon av arbeidsmåten til klippfiskeksportørar på Møre på 1800-talet med utgangspunkt i handelshuset Christian Johnsen i Kristiansund.

Både Arnljot Løseth og Atle Døssland er professor i historie ved historisk institutt, Høgskulen i Volda, medan Trudi Henrydotter Eikrem er stipendiat ved same institutt.

Etter föredraga demonstrerte den portugisiske kokken Tiago Lopes framstilling av ein tradisjonsrik klippfiskrett frå Portugal. Denne retten fekk deltakarane nytte som avslutning på arrangementet.

Til saman 25-30 tilhøyrarar hadde møtt fram på seminaret som vart halde på Klippfiskakademiet i Ålesund, laurdag 19. september. Seminaret var ein del av Forskingsdagane 2015. I tillegg til Hifo Nordvestlandet var Klippfiskakademiet og Høgskulen i Volda med på arrangørsida.

## **Planlegginga av Norske historiedagar 2016**

Hausten 2014 fekk HIFO Nordvestlandet førespurnad frå HIFO sentralt om å arrangere Norske historiedagar 2016. Ein vedtok å ta på seg ansvaret for dette arrangementet, under føresetnad av at Høgskulen i Volda og historisk institutt ved høgskulen kom med på arrangørsida. Etter positive svar både frå historisk institutt og høgskulen vart det 15. januar 2015 sendt melding til HIFO sentralt om at HIFO Nordvestlandet tok på seg arrangementet. Det vart no sett ned ein eigen arrangementskomité med medlemmer frå styret i HIFO Nordvestlandet og historisk institutt. Frå HIFO Nordvestlandet vart følgjande valde som medlemmer i komitéen: Anders Aschim, Eirik Holmen, Torgeir Melsæter og Inger Marie Okkenhaug. Historisk institutt er representert i komitéen med Arnfinn Kjelland og Atle Døssland, og komitéen vart også supplert

med Ola Teige, FoU-koordinator ved Høgskulen i Volda. Det vidare ansvaret for planlegginga av Norske historiedagar 2016 vart overlate til komitéen.

### **Arbeid i styret**

HIFO Nordvestlandet har ikkje hatt styremøte i 2015. Planlegginga av dei to seminara har i hovudsak føregått gjennom kommunikasjonen mellom styremedlemmene på e-post. Aktiviteten elles har vore knytt til arbeidet i arrangementskomitéen for Norske historiedagar 2016, der fleire av styremedlemmene har vore med.

HIFO Nordvestlandet har pr. dags dato 35 medlemmer, ein mindre enn i 2015.

Desse har sete i styret:

Inger Marie Okkenhaug (leiar)

Harald Krøvel (kasserar)

Anders Aschim (sekretær)

Eirik Holmen (styremedlem)

Torgeir Melsæter (styremedlem)

Kari Hasle (vara)

Vibeke Lunheim (vara)

Volda, 9. juni 2016



Harald Krøvel

HIFO Nordvestlandet